

Augsburg, 18. Februar 1572

An Georg Ilsung von Tratzberg

Druck: De christiana classi, Augsburg 1572, fol. A2r-v; Quaestiones Ciceronis de officiis, Basel 1579, II, S. 3f.; Quaestiones Ciceronis de officiis, Basel 1580, II, S. 3f.

NOBILI ET MA-
GNIFICO VIRO, OMNIBVS
virtutis et sapientiae ornamenti, et ho-
norum insignibus illustri, D. Ge-
orgio Ilsungo, de Tratzberg,
equiti aurato, Hieronymus
VVolfius se com-
mendat.

Epaminondas ille, cum quo Thebanorum gloria et nata esse et concidisse dicitur, in publica suae ciuitatis laetitia et securitate, solus fertur sobrius et vigilans, solicite, ne quid Respublica detrimenti caperet, prouidisse. Id exemplum sapientissimi ducis, et principis Graeciae viri, Nobilis et magnifice vir, in hac exultatione Christianae victoriae (de qua Deo Opt[imo] Max[imo] et Iesu Christo seruatori nostro, immortalem gratiam et obedientiam debemus omnes) cum non displicere Amplitudini tuae animaduertissem: minus veritus sum eidem lucubratiunculam meam, non tam gratulabundam, quam in posterum prospicientem, quamuis reiectam ab alijs, ut ominosam fortassis, nimiumque meticulosam, exhibere: cum praesertim Ennianum illud, à maximis viris probari laudarique sciam: At Romanus homo, tum quando res bene gesta est, Corde suo trepidat. Adieci et alia eiusdem generis, superioribus annis, cum insomnia tum, ut et nuper, molesta esset (alijs enim versus scibere, alijs rebus occupatus, iampridem desij) quasi aestu quodam ingenij potius effusa, quam cura et studio elaborata. Quae si Amplitudo tua tanti fecerit, quanti et sunt, et à me ipso aestimantur: aut rugoso piperi tunicas praebebunt: aut blattas et tineas pascent. Sin aliud visum fuerit: tui nominis autoritate (quae iure meritoque summa est) et grauitate iudicij, contra obtrectatores defendantur. Augustae, Bacchanalibus: quo tempore si vulgo hominum insanire licet: cur homini literato sua somnia, vel potius insomniam, chartis illinere non liceat? Anno M. D. LXXII.